

552

春秋戰國異辭



詳校官編修臣曹錫齡

編修臣裴謙覆勘

總校官庶吉士 臣倉聖脉

校對官中書 臣葉蘭

謄錄監生 臣鄧培善

欽定四庫全書

春秋戰國異辭卷一

右春坊右諭德陳厚耀撰

周

史周本紀

節文

周自武王受命克殷

徐廣曰武王定位元年歲

在乙酉六年庚寅崩

太子誦代之是為成王使召公營洛邑

居九鼎焉成王將崩命召公畢公率諸侯以相太

子而立之太子釗遂立是為康王成康之際天下

安寧刑錯四十餘年不用康王卒子昭王瑕立昭
王時王道微缺南巡不返卒于江上立太子滿是
為穆王穆王即位春秋已五十矣王道衰微穆王
命伯音申音誡大僕國政作音罪命復寧王征犬戎
祭公謀父諫不聽詳國語遂征之得四白狼四白鹿
以歸自是荒服者不至乃作甫刑穆王立五十五
年崩子共王繫扈立共王游于涇上密康公從有
三女奔之康公不獻一年共王滅密共王崩子懿

王囂立

一作堅

懿王時王室衰詩人作刺懿王崩共

王弟辟方立是為孝王孝王崩諸侯復立懿王太子變是為夷王夷王崩子厲王胡立即位三十年好利近榮夷公大夫芮良夫諫不聽暴虐侈傲諸侯不朝民謗者殺之召公諫不聽民乃相與襲王王出奔于彘立太子靖召周公二相行政號曰共和共和十四年厲王死于彘二相共立太子靖為王是為宣王宣王即位二相輔之修政法文武

成康之遺風諸侯復宗周四十六年宣王崩子幽
 王宮涅立幽王二年西周三川皆震三年幽王嬖
 褒姒生子伯服王廢申后并去太子宜臼以褒姒
 為后伯服為太子申侯怒宜臼母家也與緡夷犬戎攻
 幽王殺王驪山下虜褒姒盡取周賂而去於是諸
 侯乃即申侯而共立故太子宜臼是為平王以奉

周祀

平王

平王立東遷于維邑辟戎寇平王之時周室衰微諸侯

疆并弱齊楚秦晉始大政由方伯

史周本紀

述異記 平王二年十旬不雨遣祭天神俄而生湯

泉金魚躍出而雨降

初周避犬戎之難東徙洛邑秦襄公以兵送王王與誓

封爵之襄公于是始國而與東諸侯通使聘享之禮

通鑑

前編

初鄭桓公為司徒善于其職甚得周衆又死于犬戎之

難王命其子掘突續乃父之職復為司徒

通鑑前編

平王十九年王懷申侯全已之功又感鄭伯迎立之功

為遣畿內之民戍申及許

鄭邑非許國也

以防戎

通鑑前編

平王不撫其民而遠屯戍于母家周人怨思作揚之水以刺之行役無期大夫思其危難作君子于役以諷

焉

詩序

子夏詩傳 荆伐申平王以周師戍申周人怨之賦

揚之水 戍者不歸室家思怨賦君子于役

申公詩說 揚之水荆子討申侯弒幽王之罪伐申

侵甫及許平王遣兵伐之周人怨思而作 君子于

役戍申者之妻所作

申侯立平王于申

幽王伐申申侯
逆戰于戲射王

自申遷洛命秦伯帥

師逐犬戎于鎬京尋遣尹伯封鎬秦伯之師過故宗廟

宮室秦人皆墾為田咸生禾黍旁皇不忍去作黍離之

詩說

詩傳 王世子宜臼弒其君幽王自立于維尹伯封

過西都而傷之賦黍離

詩序 周大夫行役至于宗周過故宗廟宮室盡為

禾黍閔周室之顛覆徬徨不忍去而作黍離之詩通鑑

載于平王二十四年

周既東遷尹伯封思西周風俗之美而傷今之不及若

作都人士詩說 詩序以為周人刺衣服無常之詩

平王時周道衰棄其九族故王族作葛藟以刺之詩序

說亦云王族流散而作詩傳同

四十九年魯隱公即位史周本紀

東遷學廢君子傷之賦子衿

子夏詩傳入王風
畧同詩序入鄭風

詩說
學校

廢也

五十一年平王崩太子洩父蚤死立其子林是為桓王

桓王平王孫也

史周本紀

桓王

三年鄭莊公朝王不禮五年鄭怨與魯易許田許田天

子之用事太山田也

史周本紀

十三年伐鄭鄭射傷桓王

桓王去歸

史周本紀

桓王伐鄭家父諫之賦節彼南山

詩傳 詩序以為家父刺幽王之詩

詩說 桓王之時任用匪人諸侯咸叛兵敗民殘家

父憂之作此詩以諫王焉

桓王伐鄭將帥不堪勞苦作嘽嘽之石

詩說入王風 詩傳云周人從

征之婦之詩入王風 詩序以為下國刺幽王之詩

桓王之世伐滕薛唐杞諸國連歲不息周人苦之作何

草不黃

詩說入王風 詩傳亦云桓王之詩序以為下國刺幽王之詩

二十三年桓王崩子莊王佗立

史周本紀

莊王

四年周公黑肩欲殺莊王而立王子克辛伯告王王殺

周公王子克奔燕

史周本紀

齊襄公殺魯桓公莊王將平之使榮叔錫桓公命因使

魯莊公主昏以桓王之妹嫁襄公周人傷之而作何彼

穠矣

詩說入王風 詩傳亦入王風 詩序美王姬之執婦道也入召南

莊王不明賢人放逐國人思之作丘中有麻

詩序

詩傳 留子賢而退隱周人慕之賦丘中

十五年莊王崩子釐王胡齊立史周本紀

釐王

僖王棄賢大夫諷之賦唐棣

詩傳入王風詩說亦同按今經文無此詩而詩說

云首章興也二章三章賦也則此詩實三章矣蓋此章三章即東門之埤兩章而首章即唐棣之華偏其反而豈不爾思室是遠而四句正與東門辭義相似本以唐棣名篇後為夫子逸去故以東門名篇今詩傳詩說皆缺東門可知矣曲沃武公以寶器賂王王以武公為晉侯通鑑前編

釐王三年齊桓公始霸五年釐王崩子惠王閔立史周本紀

惠王

惠王元年號公晉侯鄭伯使原伯逆王后于陳號晉朝
王在周鄭伯以齊執其卿求王為援亦在京師故倡義

為王定昏

陳媯也即惠后
通鑑前編

紀年

晉獻公元年

即惠王元年

王如成周周有白兔舞

于市

二年王子頽亂王居于鄭鄭入王府多取玉

玉化為蜮射人

惠王二年王出奔温初莊王嬖姬姚生子頽頽有寵及

惠王即位奪其大臣園以為園故大夫邊伯等五人作

亂謀召燕衛師伐惠王惠王奔溫已居鄭之櫟立釐王

弟頹為王樂及徧舞鄭虢君怒四年鄭與虢君伐殺王

頹復入惠王史周本紀約左氏文十年賜齊桓公為伯

二十五年惠王崩子襄王鄭立史周本紀

襄王

初襄王母蚤死後母曰惠后生叔帶孝經援神契云周襄王不能事其母

弟彗入斗亡其度有寵于惠王襄王畏之史周本紀

新語 周襄王不能事後母出居于鄭而下多叛其

親

三年叔帶與戎翟謀伐襄王王欲誅叔帶叔帶奔齊齊

桓公使管仲平戎于周使隰朋平戎於晉

戎伐周晉伐戎救周故平

之王以上卿禮管仲管仲曰臣賤有司也有天子之二

守國高在若節春秋來承王命何以禮焉陪臣敢辭王

曰舅氏余嘉乃勲毋逆朕命管仲卒受下卿之禮而還

九年齊桓公卒十二年叔帶復歸于周

史周本紀自平戎以下見左

傳僖十

二年

春秋戰國異辭

春秋戰國異辭

八

襄王十三年鄭伐滑王使游孫伯服請滑二子周鄭人

囚之鄭文公怨惠王之入不與厲公爵事見左莊二十一年又怨

襄王之與衛滑滑世服于鄭後自故囚伯服王怒將以

翟伐鄭富辰諫曰凡我周之東徙晉鄭焉依子頽之亂

又鄭之由定今以小怨棄之不可詳國語王不聽十五年

王降翟師以伐鄭王德翟人將以其女為后富辰諫曰

平桓莊惠皆受鄭勞王弃親親翟不可從王不聽十六

年王絀翟后翟人來誅殺譚伯富辰諫曰吾數諫不從

如是不出王以我為懟乎乃以其屬死之初惠后欲立
王子帶故以黨開翟人翟人遂入周襄王出奔鄭鄭居
王子汜子帶立為王取襄王所絀翟后與居温十七年
襄王告急于晉晉文公納王而誅叔帶襄王乃賜晉文
公珪鬯弓矢為伯以河內地與晉二十年晉文公召襄
王襄王會之河陽踐土諸侯畢朝書諱曰天王狩于河

陽

史周本紀

新書

卷二

周襄王出逃伯鬪晉文公率師誅賊定周

國之亂復襄王之位於是襄王賞以南陽之地文公
 辭南陽即祈死得以隧下襄王弗聽曰周國雖微未
 之或代也天子用隧伯父用隧是二天子也以地為
 少余請益之文公乃退

二十四年晉文公卒 三十一年秦穆公卒 史周本紀

三十二年襄王崩子頃王壬臣立

頃王

頃王六年崩子匡王班立

匡王

匡王六年崩弟瑜立是為定王

以上史
周本紀

定王

元年楚莊王伐陸渾之戎次洛使人問九鼎王使王孫

滿應設以辭楚兵乃去

史周本紀
約左氏文

五年秋河徙矜礫

音零
地名

自禹導河至是年已歷十七

甲子以後漸失禹之故跡矣

通鑑
前編

二十一年定王崩子簡王夷立

簡王

十四年簡王崩子靈王泄心立

以上史
周本紀

靈王

元倉子居息壤五年靈王使祭公致篚帛與幼璐曰余
 末小子否德忝位水旱不時藉為人君何以禳之元倉
 子曰水陰沴也陰于國政類刑人事類私旱陽過陽于
 國政類德人事類盈楚以為幾遭水旱楚元倉
子名天子宜
 正刑修德百官宜去私戒盈則以類而消百福日至矣

元倉子
政道

祭公問賢材何從而致元倉子曰賢正可待不可求材
慎在求不在無若天子靜大臣明刑不避貴澤不隔下
則賢人自至而求用矣賢人用則四海之內明目而視
清耳而聽坦心而無鬱矣天自成地自寧萬物醇化鬼
神不能靈故曰賢正可待不可求若天子勤明大臣和
理之求士也則恢弘方大公直靖人之材至若天子苛
察大臣躁急之求士也則曲心巧應毀方破道之材至

若天子疑忌大臣巧隨之求士也則竒姓異名仄媚怪
術之材至若天子自賢大臣固位之求士也則事文逐
譽貪濁浮麗之材至若天子依違大臣回佞之求士也
則內忠外僻情毒言和之材至故曰材慎在求不在無
昔者黃帝得常仙封鴻鬼容丘商王得伊尹中興得甫
申齊桓得甯籍皆由數君體道邁仁布昭聖武思輯光
明寬厚昌正而衆賢自至而求用非為簡核而得之也
祭公云賢人不求而自至亦有非賢不求而自至者乎

亢倉子曰夫非賢不求而自至者固衆矣天下有道則
賢人不求而自至天下無道則非賢不求而自至人主
有道者寡無道者衆天下賢人少不肖者多是知非賢
不求而自至者多矣祭公曰賢固濟天下材亦能濟天
下賢與材安取異耶亢倉子曰宥乎哉其問也夫功成
事畢不殉封譽恭退樸儉之謂賢功成事畢榮在祿譽
光揚滿志之謂材賢可以鎮國材亦可以理國所謂鎮
者和寧無為人不知其力所謂理者勤率其事人知所

于德一賢統衆材則有餘衆材度一賢猶不足如是賢材之殊域有居山林而誼者有在人俗而靜者有誼而正者有靜而邪者凡視察其貌鄙俗而能有賢者萬不一有視察其貌端雅而實小人者十而九夫不練其言而知其文不責其儀而審其度不采其譽而知其善不流其毀而斷其實可謂有識者也

亢倉子
賢道

周靈王立二十一年孔子生于魯襄公之世夜有二蒼龍自天而下來附徵在之房因夢而生夫子有二神女

擎香露于空中而來以沐浴徵在天帝下奏鈞天之樂
列于顏氏之房空中有聲言天感生聖子故降以和樂
笙鏞之音異于俗世也又有五老列于徵在之庭則五
星之精也夫子未生時有麟吐玉書于闕里人家文云
水精之子繼衰周而素王故二龍繞室五星降庭徵在
賢明知為神異乃以繡紱繫麟角信宿而麟去相者云

夫子系殷湯水德而素王

至敬王之末魯定公二十四年魯人鉏商田于大澤得麟

以示夫子繫角之紱尚猶在焉夫子知命之將終乃抱麟解紱涕泗滂沱且麟出之時及解紱之歲垂百年矣

遺拾
記

拾遺記

周靈王

靈王二十三年起昆昭之臺亦名宣昭

聚天下異木神工得崿谷陰生之樹其樹千尋文理盤錯以此一樹而臺用足焉大榦為桁棟小枝為栝桷其木有龍蛇百獸之形又篩水精以為泥臺高百丈昇之以望雲色時有萇弘能招致神異王乃登臺望雲氣翁鬱忽見二人乘雲而至鬚髮皆黃非世俗之類也乘遊龍飛鳳之輦駕以青螭其衣皆縫緝毛

羽也王即迎之上席時天下大旱地裂木燃一人先
唱能為雪霜引氣一噴則雲起雪飛坐者皆凜然宮
中池井堅冰可琢又設狐腋素裘紫羅文褥羅褥是
西域所獻也施于臺上坐者皆溫又有一人唱能使
即席為炎乃以指彈席上而暄風入室裘褥皆棄於
臺下時有容成子諫曰大王以天下為家而染異術
使變夏改寒以誣百姓文武周公之所不取也王乃
踈葺弘而求正諫之士時異方貢玉人石鏡此石色

白如月照面如雪謂之月鏡有玉人機捩目能轉動
萇弘言于王曰聖德所招也故周人以萇弘幸媚而
殺之流血成石或言成碧不見其尸矣 有韓房者
自渠胥國來獻玉駝高五丈虎鳧鳳凰高六尺火齊
鏡廣三尺闔中視物如畫向鏡語則鏡中影應聲而
答韓房身長一丈垂髮至膝以丹砂畫左右手如日
月盈缺之勢可照百餘步周人見之如神明矣靈王
末年亦不知所在

又浮提之國獻神通善書二人乍老乍少隱形則
出影聞聲則藏形出肘間金壺四寸上有五龍之檢
封以青泥壺中有黑汁如淳漆灑地及石皆成篆隸
科斗之字記造化人倫之始佐老子撰道德經垂十
萬言寫以玉牒編以金繩貯以玉函晝夜精勤形勞
神倦及金壺汁盡二人剗心瀝血以代墨焉遞鑽腦
骨取髓代為膏燭及髓血皆竭探懷中玉管中有丹
藥之屑以塗其身骨乃如故老子乃更除其繁紊存

五千言及至經成工畢二人亦不知所往

靈王太子晉幼有盛德聰明博達師曠與言弗能尚也

晉年十五顧而問曰聞太師能知人年之短長也師曠

對曰女色赤白女聲清汙女色不壽晉曰然吾後三年將

上賓于天女慎無言禍將及女其後三年太子果死

俗風

通卷之二

晉平公使叔譽于周見太子晉而與之言

叔譽叔向也太子晉靈王

太子五稱而五窮遂巡而退

五稱說五事也

迄不遂

遂終歸告公也

曰太子晉行年十五而臣弗能與言君請歸聲就復與

田聲就復與周之二邑為晉所取若不反及有天下將以為誅平公將

歸之師曠不可曰請使瞋臣往與之言若能蒙予反而

復之師曠見太子稱曰吾聞王子之語高于泰山夜寢

不寐晝居不安不遠長道而求一言王子應之曰吾聞

太師將來甚喜而又懼吾年甚少見子而懾盡忘吾度

師曠曰缺三字吾聞王子古之君子其成不驕有成德而不驕自

晉始如周行不知勞王子應之曰古之君子其行至慎

天下施闢道路無限百姓悅之相將而遠遠人來驩視

道如尺尺喻近師曠告善又稱曰古之君子其行可則由

舜而下其孰有廣德王子應之曰如舜者天居其所以

利天下奉翼遠人皆得已仁此之謂天言其仁合天道如禹者

聖勞而不居以利天下好取不好與必度其正是謂之

聖如文王者其大道仁其小道惠三分天下而有其二

敬人無方服事于商既有其眾而返失其身此之謂仁

如武王者義殺一人而以利天下異姓同姓各得之謂

義師曠告善又稱曰宣辨名命異姓惡方王侯君公何
以為尊何以為上王子應之曰人生而重丈夫謂之冑
子冑子成人能治上官謂之士冑士率衆時作謂之曰
伯伯能移善于衆與百姓同謂之公公能樹名與物天
道俱謂之侯侯能成羣謂之君君有廣德分任諸侯而
敦信曰予一人善至于四海曰天子達于四荒曰天王
四荒至莫有怨訾乃登為帝師曠磬然又稱曰溫恭敦
敏方德不改聞物

闕字

二

下學以起尚登帝臣乃參天子

自古誰王子應之曰穆穆虞舜明明赫赫立義治律萬物皆作分均天財萬物熙熙非舜而誰能師曠束躅其足曰善哉善哉王子曰太師何舉足驟師曠曰天寒足躅是以數也王子曰請入坐遂敷席注瑟師曠歌無射曰國誠寧矣遠人來觀修義經矣好樂無荒乃注瑟于王子王子歌嶠曰何自南極至于北極絕境越國弗愁道遠師曠蹶然起曰瞑臣請歸王子賜之乘車四馬曰太師亦善御之師曠對曰御吾未之學也王子曰汝不

為夫詩曰馬之剛矣轡之柔矣馬亦不剛轡亦不柔志

氣庶庶取予不疑以是御之

庶庶和擾也
疑和之心也

師曠對曰

瞑臣無見為人辨也唯耳之情而耳又寡聞而易窮王

子汝將為天下宗乎王子曰太師何汝賤我乎自太皞

以下至于堯舜禹未有一姓而再有天下者夫天當時

而不伐天何可得且吾問汝之人年長短告吾師曠對

曰汝聲清汙汝色赤白汝色不壽王子曰吾後三年上

賓于帝所汝慎無言禍將及汝師曠歸未三年告死者

至周書太子晉

列仙傳 王子喬者周靈王太子晉也好吹笙作鳳

凰鳴遊伊洛之間道士浮丘公接以上嵩高山三十

餘年後求之于山上見桓良曰告我家七月七日待

我于緱氏山巔至期果乘白鶴駐山頭望之不得到

舉手謝時人數日而去遂立祠于緱氏山下及嵩高

首焉

世語 王子喬墓在京陵戰國時人有盜發之者覩

無所見惟有一劍停在穴中欲進取之劍作龍鳴虎
吼遂不敢進俄而徑飛上天

二十七年靈王崩子景王貴立

史周本紀

靈王生而有鬣而神其冢在河南城西南栢亭周山上

民祀之不絕

皇覽

景王

景王好音而士遂習音君子諷之作君子陽陽

詩說詩傳同

詩序 君子陽陽閔周也君子遭亂相招為祿仕全

身遠害而已

孔子適周問禮于老子老子曰子所言者其入與骨皆已朽矣獨其言在耳且君子得其時則駕不得其時則蓬累而行吾聞之良賈深藏若虛君子盛德容貌若愚去子之驕氣與多欲汰色與淫志是皆無益于子之身吾所以告子者若是而已孔子去謂弟子曰鳥吾知其能飛魚吾知其能遊獸吾知其能走走者可以為罔游者可以為綸飛者可以為矰至于龍吾不知其乘風雲

而上天吾今日見老子其猶龍耶

史老子傳 老子者楚苦縣厲鄉曲仁里

人也姓李名耳字伯陽謚曰聃周守藏室之吏也孔子適周在景王二十三年或云敬王二年

老子見孔子從弟子五人問曰為誰對曰子路為勇其

次子貢為智曾子為孝顏回為仁子張為武老子嘆曰

吾聞南方有鳥其名為鳳所居積石千里天為生食其

樹名瓊枝高百仞以璆琳琅玕為實天又為生離珠一

人三頭遞卧遞起以伺琅玕鳳鳥之文戴聖嬰仁右智

左賢

藝文類聚引莊子今無此

老聃在周之末居反景日室之山與世人絕跡惟有黃
髮老叟五人或乘鴻鶴或衣羽毛耳出于頂瞳子皆方
面色玉潔手握青筠之杖與聃共談天地之數及聃退
跡為柱下史求天下服道之術四海名士莫不爭至五

老即五方之精也

拾遺記
周靈王

孔子適周見萇弘言終退萇弘語劉文公曰吾觀孔仲
尼有聖人之表河目而隆顙黃帝之形貌也脩肱而龜
背長九尺有六寸成湯之容體也然言稱先王躬履謙

讓洽聞強記博物不窮抑亦聖人之興者乎劉子曰方
今周室衰微而諸侯力爭孔丘布衣聖將安施萇弘曰
堯舜文武之道或弛而墜禮樂崩喪亦正其統紀而已
矣既而夫子聞之曰吾豈敢哉亦好禮樂者也

孔叢
子上

孔子觀周遂入太祖后稷之廟廟堂右階之前有金人
焉參緘其口而銘其背曰古之慎言人也戒之哉無多
言多言多敗無多事多事多患安樂必戒無行所悔勿
謂何傷其禍將長勿謂何害其禍將大勿謂不聞神將

同人焯焯不滅炎炎若何涓涓不壅終為江河綿綿不絕或成網羅毫末不札將尋斧柯誠能慎之福之根也曰是何傷禍之門也強梁者不得其死好勝者必遇其敵盜憎主人民怨其上君子知天下之不可上也故下之知衆人之不可先也故後之溫恭慎德使人慕之執雌持下人莫踰之人皆趨彼我獨守此人皆或之我獨不徙內藏我智不示人技我雖尊高人弗我害江海雖左長于百川以其卑也天道無親而能下人戒之哉孔

子既讀斯文也顧謂弟子曰小子識之此言實而中情而近詩曰戰戰兢兢如臨深淵如履薄冰行身如此豈

以口過患哉

家語又說苑敬慎

孔子觀乎明堂覩四門墉有堯舜之容桀紂之象而各有善惡之狀興廢之戒焉又有周公相成王抱之負斧扆南面以朝諸侯之圖焉孔子徘徊而望之謂從者曰此周之所以盛也夫明鏡所以察形往古所以知今人主不務襲跡于其所以安存而忽怠所以危亡未有異

于却步而求及前人也豈不惑哉 家語

景王崩王室亂兵連歲饑民物盡耗君子自傷生逢其

難而作茗之華 詩說入王風 詩傳云王室亂人不聊生賦茗之華入王風 詩序以為幽王

時大夫閔周室之將亡已適逢之詩

景王十八年后太子聖而蚤卒二十五年景王愛子朝之 王

長庶欲立之會崩子丐之黨與爭立國人立長子猛為 子

王子朝攻殺猛是為悼王晉人攻子朝而立丐是為敬

王 猛之母弟 史周本紀

皇覽 景王冢在洛陽太倉中秦封呂不韋洛陽十
萬戶故大其城并圍景王冢也

春秋戰國異辭卷一

於大會中秦扶呂不韋告新十

欽定四庫全書

春秋戰國異辭卷二

右春坊右諭德陳厚耀撰

周

敬王

敬王元年晉人入敬王子朝自立敬王不得入居澤四

年晉率諸侯入敬王子朝為臣

左傳云子朝奔楚皇覽云子朝冢在

南陽西鄂縣今西鄂諸侯城周

晁氏自謂子朝後也

十六年子朝之徒復作亂敬王奔于晉十七年晉定公

遂入敬王于周

以上史
周本紀

敬王二十八年殺其大夫萇弘周劉氏與晉范氏世為

婚姻弘事劉氏故與范氏趙鞅以為討周人殺弘

通鑑
前編

弘蜀
資中人

叔向之讒萇弘也為萇弘書謂叔向曰子為我謂晉君

所與君期者時可矣何不亟以兵來因佯遺其書周君

之庭而急去行周以萇弘為賣周也乃誅萇弘

韓子內
儲下

呂覽必已篇
聶弘矢心王室而王不能用且殺弘以悅
趙鞅弘死藏其血三年而為碧以殺之不當其罪也

說苑權謀叔向之欲殺聶弘也數見聶弘于周因佯

遺書曰聶弘謂叔向曰子起晉國之兵以攻周吾廢

劉氏而立單氏劉氏請之君曰此聶弘也乃殺之

聶弘忠于王晉趙鞅殺之周人傷之賦有兔詩傳詩

序云桓王失信諸侯背叛構怨連禍
王師傷敗君子不樂其生作兔爰

老子修道德其學以自隱無名為務居周久之見周之

衰乃遂去至闕闕令尹喜曰子將隱矣彊為我著書于

是老子乃著書上下篇言道徳之意五千餘言而去莫

知其所終或曰老萊子亦楚人也著書十五篇言道家之用與孔子同時列仙傳曰闕令喜者周

大夫也善內學星宿服精華隱徳行仁時人莫知老子西遊喜見其氣知真人當過候物色而迹之果得老子

老子亦知其竒為著書與老子俱之流沙之西服具勝實莫知其所終亦著書九篇名闕尹子列異傳云老

子西遊闕令尹喜望見有紫氣蓋老子百有六十餘歲浮闕而老子果乘青牛而過也

或言二百餘歲以其修道而養壽也史老子傳

高士傳 老子李耳字伯陽陳人也生于殷時為周

柱下史好養精氣貴接而不施轉為守藏史積八十

餘年

史記云二百餘年

時稱為隱君子謚曰聃仲尼至周見

之知其聖人乃師之後周德衰乃乘青牛車去入于

秦

敬王元年也

過西關關令尹喜望氣先知乃物色遮候

之已而老子果至乃強使著書作道德經五千餘言

為道家之宗以其年老故號其書為老子

拾遺錄

老子當周之末居山與世人絕迹惟有黃

髮友五人手杖青筇之杖出入室中與老子談

神仙傳

老子姓李名耳字伯陽楚國苦縣賴鄉人

也其母感大星而有娠生于李家以李為姓又云其
母懷之八十一歲乃生生時剖其母左腋而出出而
白首故謂之老子又云母到李樹下生老子生而能
言指李樹曰以此為我姓又有老聃之號老子鶴髮
龍顏黃色美眉廣額長耳大目疏齒方口厚唇額有
參牛達理日角月庭鼻純骨雙柱耳有三門足蹈三
五手把十文以周武王時為柱下史時俗見其久壽
故號之老子所出度世之法九丹八石玉醴金液養

性絕穀變化役使鬼神之法 本行經云太上老君
託胎洪氏之胞凝神瓊胎之府 又老子內傳云其
母曾見日精下落如流星飛入口中因有娠七十二
歲而生常有五色雲繞其形五行之獸衛其堂於陳
國渦水李樹下剖左腋而生又曰頂有日光身濕白
血面凝金色舌絡錦文形長一丈二尺齒有四十八
受元君神圖寶章變化之方及還丹伏火水汞液金
之術凡七十二篇

又神仙傳 老子將去周而出關以升崑崙關令尹
喜占風逆知當有神人來過乃掃道見老子老子知
喜命應得道乃停關下以長生之術授之

陽子居南之沛老聃西遊于秦邀于郊至于梁而遇老
子老子中道仰天而歎曰始以汝為可教今不可也陽子
居不答至舍進盥漱中櫛脫屣戶外膝行而前曰向者
弟子欲請夫子夫子行不問是以不敢今聞矣請問其
故老子曰而睢睢仰目而盱盱張目而誰與居太白若辱盛

德若不足陽子居蹴然寢容曰敬聞命矣其往也舍者
迎將其家公執席妻執巾櫛舍者避席煬者避竈其反
也舍者與之爭席矣

莊子
寓言

地志

鞏昌府

尹喜秦州人函谷關令見紫氣東來謂有

真人過果遇老子授以道德經後仙去與老子會于

蜀賜號文始先生

關令內傳

關令尹喜周之大夫也母氏嘗晝寢夢

天下絳霄流繞其身見長人語令咽之既覺口有盈

味及真人生時有雙光若日飛遊其側室內皆明良
久不知所在其家陸地自生蓮華光色鮮盛眼有日
精姿形長雅垂臂下膝堂堂有天人之貌少好學墳
素善于天文秘緯仰看俯察莫不洞察雖鬼神無以
匿其真狀老子感焉未至九十日闕令登樓四望見
東極有紫氣西邁喜曰夫陽氣盡九星宿值合歲月
並王復九十日之外法應有聖人經過京邑至期齋
戒其日果見老子乘青牛車來度

又周元極

極當作王
極一作無極

元

元年歲在癸丑

癸當作乙冬十

二月二十五日老子度函谷關關令尹喜先敕門吏

曰若有老翁從東來乘青牛薄板車者勿聽過關其

日果見老翁乘青牛車求度關關吏入白喜曰諾道

今來矣我見聖人矣即帶印綬出迎設弟子之禮老

子授喜道德五千言

又老子與尹喜登崑崙山金臺玉樓七寶宮殿晝

夜光明乃天帝四王之所遊處有珠玉七寶之狀

又 尹喜共老子西游省太真王母共食碧桃紫梨
玉文之棗其實如瓶

又 真人遊時各坐蓮花之上花輒徑十大

顧歡夷夏論 老子入關之天竺維衛國國王夫人

名曰淨妙老子因其晝寢乘日精入妙淨口中後年

四月八日夜半時剖右脇而生墜地即行七步于是

佛道興焉此出玄妙內篇經

見宋書

四十一年楚滅陳孔子卒四十二年敬王崩子元王仁

立

元王

元王八年崩子定王介立

定王一
作貞王

定王

定王二十八年崩長子去疾立是為哀王哀王立三月

弟叔襲殺哀王而自立是為思王思王立五月少弟寬

攻殺思王而自立是為考王此三王皆定王之子

以上
史周

本紀

考王

考王元年封弟揭于河南王城也以續周公之職是為西

周桓公通鑑前編

考王十五年崩子威烈王午立史周本紀

威烈王

周威王時有匡裕者字子希裕一作俗生而神靈廬于廬山世

稱廬君故山亦曰匡廬周景式廬山記

地志 江西南康府府城西北匡廬山周時匡裕七

人結廬隱此故名疊嶂九層崇巖萬仞周五百餘里
費子陽謂子思曰吾念周室將滅涕泣不可禁也子思
曰然今以一人之身憂世之不治而涕泣不禁是憂
河水濁而以泣清之也

尸子

二十三年九鼎震命韓魏趙為諸侯二十四年王崩子

安王驕立

安王

安王立二十六年崩子烈王喜立

烈王

烈王二年周太史儋見秦獻公曰獻公十一年見始周與秦國

合而別別五百載復合周封非子為附庸邑之秦是始合也及秦襄公始列為諸侯是

別之也自秦列為諸侯至昭王五十二年西周君臣獻邑二十六城以入于秦凡五百一十六年是合也云五

百舉其大數合十七歲秦紀作七十七而霸王者出焉武王昭王皆霸王皆

下王天

十年烈王崩弟扁立是為顯王以上俱史周本紀

顯王

西周桓公卒子威公立威公卒子惠公代立復封其少

子班名于鞏以奉王號東周惠公 世本西周桓公名

揭居河南東周惠公名班居洛陽

韓子內儲下周太子公子朝其弟公子根甚有寵于君

君死遂以東周叛分為兩國

括地志 史記周顯王二年西周惠公封少子班於

鞏為東周其武公為秦所滅 正義引據此東周之

分在顯王二年即趙世家所謂分周為兩者周本紀

無此事是史疎也

顯王五年賀秦獻公獻公稱伯九年致文武胙於秦孝
公二十五年秦會諸侯於周二十六年周致伯於秦孝
公三十三年賀秦惠王三十五年致文武胙於秦惠王

史周本紀

秦師臨周以求九鼎顯王患之以告顏率

此事詳國策然以顯王為

周君謂東周惠公也

率曰請救于齊遂說齊王曰秦無道欲興師

求周之鼎君臣計不若歸齊即願王圖之齊王悅發師

救周秦師罷齊求鼎顏率曰周即獻鼎然不可懷挾提
揭不識何塗之從王曰塗于梁率曰梁欲求鼎謀暉臺
之下小海之上梁必不出也王曰從楚率曰謀于章華
臺之上楚必不出矣齊王乃止

春秋後語

初晉太史屠黍

黍一作餘

見晉之亂也見晉公之驕而無德

義也以其圖法歸周

屠黍晉出公之太史也出公頃公之孫定公之子也史記曰智伯攻

出公出公奔齊而道死焉周威公見而問焉

考王封其弟於河南為桓公威公桓公之子也

曰天下之國孰先亡對曰晉先亡威公問其故對曰臣

比在晉也不敢直言示晉公以天妖日月星辰之行多不當曰是何能為又示以人事多不義百姓皆鬱怨曰是何能傷又示以隣國不服賢良不舉曰是何能害如是是知所以亡也故臣曰晉先亡居三年晉果亡威公又見屠黍而問焉曰孰次之對曰中山次之威公問其故對曰天生民而令有別有別人之義也所異於禽獸麋鹿也君臣上下之所以立也中山之俗以晝為夜以夜繼日男女切倚固無休息

切磨也倚近也無淫昏康
休息晝夜宣淫也

樂歌謳好悲

樂極則繼之以悲也

其主弗知惡此亡國之風也臣

故曰中山次之居二年中山果亡威公又見屠黍而問

焉曰孰次之屠黍不對威公固問焉對曰君次之威公

乃懼求國之長者得義蒔

義蒔一作錡疇

田邑而禮之

二人賢者也

得史麟趙駢

駢一作理駢一作巽

以為諫臣去苛令三十九物

物事

也 以告屠黍對曰其尚終君之身乎臣聞之國之興也

天遺之賢人與極言之士國之亡也天遺之亂人與善

諛之士威公薨肆九月不得葬周乃分而為二

下棺置地中謂

之肆

呂覽先識
人說苑權謀

周威公問于甯子曰取士有道乎對曰有窮者達之亡者存之廢者起之四方之士則四面而至矣窮者不達亡者不存廢者不起四方之士則四面而畔矣夫城固不能自守兵利不能自保得士而失之必有其間夫士存則君尊士亡則君卑周威公曰士壹至如此乎對曰君不聞夫楚平王有士曰楚僂胥丘負容王將殺之出亡之晉晉人用之是為城濮之戰又有士曰苗賁皇王

將殺之出亡走晉晉人用之是為鄢陵之戰又有士曰
上解于王將殺之出亡走晉晉人用之是為兩堂之戰
又有士曰伍子胥王殺其父兄出亡走吳闔閭用之于
是興師而襲郢故楚之大得罪於梁鄭宋衛之君猶未
遽至于此也此四得罪於其士三暴其民骨一亡其國
由是觀之士存則國存士亡則國亡子胥怒而亡之申
包胥怒而存之士胡可無貴乎

說苑尊賢 漢書
儒家寧越一篇

寧越中牟鄙人也苦耕之勞謂其友曰何為而可以免

此苦也友曰莫如學學二十年一作三十年則可以達矣甯

越曰請十五歲一作十歲人將休吾將不休人將卧吾不敢

卧十五歲而周威公師之說苑又呂覽建本

田開之見周威公威公曰吾聞祝腎學生養生也吾子與

祝腎遊亦何聞焉田開之曰聞之操拔篲以待門庭亦

何聞于夫子威公曰田子無讓寡人願聞之開之曰聞

之夫子曰善養生者若牧羊然視其後者而鞭之威公

曰何謂也田開之曰魯有單豹者岩居而水飲不與民

共利行年七十而猶有嬰兒之色不幸遇餓虎餓虎殺

而食之有張毅者高門高門大家也縣簿縣簿小戶也無不走也行

年四十而有內熱之病以死豹養其內而虎食其外毅

養其外而病攻其內此二子者皆不鞭其後者也仲尼

曰無入而藏無出而陽柴立其中央柴立木偶無心也三者若

得其名必極夫畏塗者十殺一人則父子兄弟相戒也

必盛卒徒而後敢出焉不亦知乎人之所取畏者衽席

之上飲食之間而不知為之戒者過也祝宗人立端以

臨牢筴說珣曰汝奚惡死吾將三月撻汝十日戒三日

齋藉白茅加汝肩尻乎彫俎之上則汝為之乎珣謀曰

不如食以糠糟而錯之牢筴之中自為謀則苟生有軒

冕之尊死于豚楯之上聚儻之中則為之

豚楯畫盾也聚儻曲薄所

以撻聚物者言被刑戮而置于此也為珣謀則去之自為謀則取之所異

珣者何也

莊子達生

張儀蘇秦二人同志好學迭剪髮而鬻之以相養或傭

力寫書非聖人之言不讀遇見墳典行途無所題記以

墨書掌及股裏夜還而寫之折竹為簡二人每假食于路剝樹皮編以為書帙以盛天下良書嘗息大樹之下假息而寐有一先生問二子何勤苦也儀秦又問之子何國人答曰吾生于歸谷亦云鬼谷鬼者歸也又云歸者谷名也乃謂其術教以干世出俗之辯即探胷內得

二卷說書言輔時之事

拾遺記

周有豪士居鬼谷號為鬼谷先生蘇秦張儀往見之先生曰吾將為二子陳言至道子其齋戒擇日而學後儀

秦齋戒而往鬼谷子

鬼谷先生隱居韜志居鬼谷山因以為稱蘇秦張儀師之遂立功名先生遺書責之曰二君豈不見河邊之樹乎僕御折其枝波浪盪其根上無徑尺之陰身被數千之痕此木豈與天地有仇怨所居然也子不見嵩岱之松栢華霍之檀桐乎上枝干于青雲下根通于三泉千秋萬歲不受斧斤之患此木豈與天地有骨肉哉蓋所

居然也

袁淑真
隱傳

蘇秦張儀學縱橫之術于鬼谷先生掘地為坑曰下說
令我泣出則能分人君之地秦說鬼谷先生先生泣下

霑襟論衡

地志河南鬼谷子晉平公時人姓王名詡顏如童居

青溪之鬼谷戰國時蘇秦張儀嘗問道三年辭去鬼

谷子曰二子輕松喬之永壽貴一旦之浮雲惜哉

張儀魏氏餘子也大夫庶子為餘受氏為張將西遊於秦過東周客

有語之於昭文君者曰魏氏人張儀材士也將西遊於

秦願君之禮貌之也昭文君見而謂之曰聞客之秦寡人之國小不足以留遊客雖然豈必遇哉客或不遇請為寡人一歸也國雖小請與客共之張儀還走北面再拜張儀行昭文君送而資之至於秦留有間惠王說而相之張儀所得於天下者無若文君令秦惠王師之

昭師

文君逢澤之會魏王嘗為御韓王為右

秦會諸侯於逢澤魏王為昭文君御

韓王為名號至今不忘此張儀之力也

呂覽報更

錄異記鬼谷先生者古之真仙也云姓王氏自軒轅

之代歷於商周隨老君西化流沙泊周末復還中國
居漢濱鬼谷山受道弟子百餘人惟張儀蘇秦不慕
神仙好縱橫之術時王綱頽弛諸侯相征陵弱暴寡
干戈雲擾二子得志肆唇吻於戰國之中或遇或否
或屯或泰以辨譎相高爭名貪祿無復雲林之志先
生遺儀秦書曰二君足下功名赫赫但春到秋不得
久茂日既將盡時既將老君不見河邊之樹乎僕馭
折其枝波浪激其根此木非與天下人有仇怨所居

者然也子不見嵩岱松柏華霍之樹上葉凌青雲下
根通三泉上有玄狐黑猿下有豹隱龍潛千秋萬歲
不逢斤斧之患此木非與天下人有骨肉蓋所居者
然也今二子好雲路之榮慕長久之功輕喬松之永
延貴一夕之浮爵痛焉悲夫二君痛焉悲夫二君儀
秦答書曰先生秉德含弘饑必噉芝英渴必飲玉漿
德與神靈齊明與三光同不忘賜書戒以貪昧儀以
不敏名聞不昭入秦匡霸欲翼時君刺以河邊喻以

深山雖素空閭誠銜斯旨儀等曰偉哉先生玄覽遐
鑒興亡皎然二子不能抑志退身甘蓼蟲之樂棲竹
葦之巢自掇泯滅悲夫痛哉

說苑 鬼谷子曰人之不善而能矯之者難矣說之
不行言之不從者其辯之不明也既明而不行者持
之不固也既固而不行者未中其心之所善也辯之
持之明之固之又中其人之所善其言神而珍白而
分能入於人之心如此而說不行者天下未嘗聞也

此之謂善說

鬼谷子 鬼谷先生曰蘇秦張儀一體也然其矯尾厲角含吐縱橫儀不如秦是能分人主之地也 今本無

典畧 邯鄲之北有蘇大侯者蘇秦往說之大侯送以黃金百鎰其家亟諫曰君侯之與客無故舊而送之百金其說可得聞邪蘇大侯曰客天下辯士也立談之間再奪吾地而復歸之吾地雖小豈直百金耶

漢書 從橫家蘇子三十一篇名秦 張子十篇名

儀

周顯王四十二年九鼎淪沒泗淵後秦始皇時見于泗

水始皇大喜使數千人入水系而行未出龍齒啣斷其

系故泗上為之謠云稱樂大早絕鼎系水經注 史紀 周末九鼎

沒于泗水彭城下秦始皇過彭城 齊戒禱祠使千人沒水求之不得

四十四年秦惠王稱王其後諸侯皆為王四十八年顯

王崩子慎靚王立 紀年 魏惠成王十一年即顯王

九年東周惠公傑夢後元八年即顯王四十二年九鼎
淪泗沒於淵

慎靚王

慎靚王立六年崩子赧王延立王赧時東西周分治王

赧徙都西周

以上史
周本紀

赧王

周赧王四年濟東有二石高三尺有餘相從而行入海

數百步

樂資春
秋後傳

周赧王負責無以歸之主迫責急乃逃于臺後因名逃

責臺

責同債
書鈔失政註
北堂

前漢書諸侯王年表第二 二周有逃責之臺

帝王世紀 赧王多負債於民上臺以避之名曰逃債

臺雒陽南宮諺臺是也

赧王八年秦攻宜陽楚救之而楚以周為秦故將伐之

宜陽韓地秦攻而楚救之周為
韓出兵而楚疑周為秦因伐周蘇代為周說楚王曰何

以周為秦之禍也言周之為秦甚于楚者欲令周入秦

也故謂周秦也于周秦相近秦欲并周而外睦周知其不

可解必入于秦此為秦取周之精者也為王計者周于

秦因善之不于秦亦言善之以疏之于秦周絕于秦必

入于郢矣史周本紀

秦借道兩周之間將以伐韓周恐借之畏於韓不借畏

於秦史厭謂周君曰何不令人謂韓公叔曰秦之敢絕

周而伐韓者信東周也公何不與周地發質使之楚秦

必疑楚不信周是韓不伐也又謂秦曰韓彊與周地將

以疑周於秦也周不敢不受秦必無辭而令周不受是

受地於韓而聽於秦

史周本紀

秦召西周君西周君惡往故令人謂韓王曰秦召西周君將以使攻王之南陽也王何不出兵於南陽周君將以為辭於秦周君不入秦秦必不敢踰河而攻南陽矣

史周本紀

東周與西周戰韓救西周或為東周說韓王曰西周故天子之國多名器重寶王案兵毋出可以德東周而西

周之寶必可以盡矣王赧謂成君史周紀

徐廣曰戰國策云韓兵入西周西周令成君辨說求救按徐廣註引戰國策一段今本所無且下文亦有脫文也

楚圍雍氏韓徵甲與粟於東周東周君恐召蘇代而告之代曰君何患於是臣能使韓毋徵甲與粟於周又能為君得高都周君曰子苟能請以國聽子代見韓相國曰楚圍雍氏期三月也今五月不能拔是楚病也今相國乃徵甲與粟於周是告楚病也韓相國曰善使者已

行矣代曰何不與周高都韓相國大怒曰吾毋徵甲與
粟於周亦已多矣何故與周高都也代曰與周高都是
周折而入於韓也秦聞之必大怒忿周即不通周使是
以弊高都得完周也曷為不與相國曰善果與周高都

史周
本紀

三十四年蘇厲謂周君曰秦破韓魏扑師武北取趙蘭
離石者皆白起也是善用兵又有天命令又將兵出塞
攻梁梁破則周危矣君何不令人說白起乎曰楚有養

由基者善射者也去柳葉百步而射之百發而百中之
左右觀者數千人皆曰善射有一夫立其旁曰善可教
射矣養由基怒釋弓搯劍曰客安能教我射乎客曰非
吾能教子支左誣右也夫去柳葉百步而射之百發而
百中之不以善息少馬氣衰力倦弓撥矢鈎一發不中
者百發盡息今破韓魏扑師武北取趙藺離石者公之
功多矣今又將兵出塞過兩周倍韓攻梁一舉不得前
功盡棄公不如稱病而無出

史周
本紀

楚欲圖周周王赧使西周武公謂楚相昭子曰三國以

兵割周郊地以便輸而南器以尊楚

三國楚齊韓也

臣以為不

然夫弑共主臣世君大國不親以衆脅寡小國不附大國不親小國不附不可以致名實名實不得不足以傷民夫有圖周之聲非所以為號也昭子曰乃圖周則無之雖然周何故不可圖也對曰軍不五不攻城不十不圍夫一周為二十晉公之所知也韓嘗以二十萬之衆辱于晉之城下銳士死中士傷而晉不拔公之無百韓

以圖周此天下之所知也夫怨結于西周以塞鄒魯之心交絕于齊聲失天下其為事危矣夫危兩周以厚三川方城之外必為韓弱矣何以知其然也西周之地絕長補短不過百里名為天下共主裂其地不足以肥國得其衆不足以勁兵雖無攻之名為弑君然而好事之君喜攻之臣發號用兵未嘗不以周為終始是何也見祭器在焉欲器之至而忘弑君之亂今韓以器之在楚臣恐天下以器讎楚也臣請譬之夫虎肉臊其兵利身

人猶攻之也若使澤中之麋蒙虎之皮人之攻之必萬
之于虎裂楚之地足以肥國誣楚之名足以尊主今子
將以欲誅殘天下之共主居三代之傳器吞三翮六翼
以高世主非貪而何周書曰欲起無先故器南則兵至
矣于是楚計輟不行

史楚世家

西周武公之共太子死有五庶子毋適立司馬翦謂楚

王曰不如以地資公子咎請立為太子左成曰

司馬翦左成皆

楚不可周不聽是公之知困而交疏于周也不如請周

君孰欲立以微告剪剪請令楚賀之以地果立公子咎

為太子

史周本紀此較國策更明

赧王四十二年秦破華陽約馬犯謂周君曰請令梁城

周

馬犯見秦破華陽約懼周危故謂請梁城周也

乃謂梁王曰周王病若死則

犯必死矣

周以國破猶身之病

犯請以九鼎自入于王王受九鼎

而圖犯

也圖收

梁王曰善遂與之卒言戌周因謂秦王曰

梁非戌周也將伐周也王試出兵境以觀之

言梁非戌周實欲取

境周實鼎王試出兵于以觀梁王之變

秦果出兵又謂梁王曰

馬犯又歸說梁王

周王病甚矣犯請後可而復之今王使卒之周諸侯皆
生心後舉事且不信不若令卒為周城以匿事端梁王

曰善遂使城周

史周
本紀

四十五年周君之秦客謂周最曰公不若譽秦王之孝
因以應為太后養地秦王必喜是公有秦交交善周君
必以為公功交惡勸周君入秦者必有罪矣秦攻周而
周最謂秦王曰為王計者不攻周攻周實不足以利聲
畏天下天下以聲畏秦必東合於齊兵弊於周合天下

於齊則秦不王矣天下欲弊秦勸王攻周秦與天下弊

則令不行矣史周本紀

五十八年三晉距秦周令其相國之秦以秦之輕也還
其行客謂相國曰秦之輕重未可知也秦欲知三國之
情公不如急見秦王曰請為王聽東方之變秦王必重
公重公是秦重周周以取秦也齊重則固有周聚以收
齊是周常不失重國之交也秦信周發兵攻三晉上全
五十九年秦取韓陽城負黍西周恐倍秦與諸侯約縱

將天下銳師出伊闕攻秦令秦無得通陽城秦昭王怒

使將軍摎攻西周西周君奔秦頓首受罪盡獻其邑三

十六口三萬秦昭王之五十年秦受其獻歸其君于周周民遂

東亡秦取九鼎寶器而遷西周公於黽狐西周公蓋武公之太子文

公也國策有周文君不知滅時定當何主周王赧亦卒後七歲秦莊襄王滅

東周東西周皆入于秦周既不祀史周本紀

史記秦本紀莊襄王元年東周君與諸侯謀秦秦使相

國呂不韋誅之盡入其國秦不絕其祀以陽人地賜

周君奉其祭祀法言周之順赧以成周而西傾秦之惠文昭襄以西山而東并孰愈曰周

也羊秦也狼然則狼愈歟曰羊狼一也

吳澄二周辨曰敬王四年子朝奔楚王雖返國然

以子朝餘黨多在王城乃徙都成周而王城之都

廢至考王封其弟于王城以續周公之官職是為

西周桓公自此以後東有王西有公而東西之名

未立也桓公生威公威公生惠公惠公之少子班

又別封于鞏以奉王是為東周惠公父子同謚以

鞏與成周皆在王城之東故謂之東班之兄則仍
襲父爵居于王城是為西周武公以王城在成周
之西故自此以後西有公東亦有公二公各有所
食而周尚為一也顯王二年趙韓分周地為二二
周公治之王寄焉而已矣周之分東西自此始九
年東周惠公卒子傑嗣慎靚王以上皆在東赧王
立始遷于西周即王城舊都也史記云王赧時東
西周分治今按顯王二年已分為二不待此時矣

前建都以鎬京為西周對洛邑為東周後二公封邑以王城為西周對成周為東周

雜錄

周主亡玉簪令吏求之三日不能得也周主令人求而得之家人之屋間周主曰吾知吏之不事事也求簪三日不得之吾令人求之不移日而得之豈謂忠我哉於是吏皆悚懼以為君神明也

韓子內儲上玉簪一作曲枝

衛侯朝于周周行問其名曰衛侯辟疆周行還之曰啓

疆辟疆天子之號也諸侯弗得用衛侯更其名曰熇然

後受之

新書卷之二

杜赫以安天下說周昭文君昭文君曰願學所以安周
杜赫對曰臣之所言者不可則不能安周矣臣之所言
者可則周自安矣此所謂弗安而安之者也

呂覽務大淮南子

道應

溫人之周周不納客問之曰客耶對曰主人問其巷人
而不知也吏因囚之君使人問之曰子非周人也而自

謂非客何也對曰臣少也誦詩曰普天之下莫非王土

率土之濱莫非王臣今君天子則我天子之臣也豈有

為人之臣又為之客哉故曰主人也君使出之韓子說林

公子沓相周申向說之而戰申向周人申不害之族也戰懼也公子沓

嘗之曰申子說我而戰為吾相也夫申向曰向則不肖

雖然公子年二十而相見老者而使之戰請問孰病哉

公子沓無以應呂覽審應

嚴遂不善周君患之馮沮曰嚴遂相而韓傀貴於君不

如行賊於韓傀則君必以為嚴氏也

韓子說林

客有為周君畫莢者三年而成君觀之與髹莢者同狀

髹赤黑色言不明也

周君大怒畫莢者曰築十版之牆鑿八尺之

牖而以日始出時加之其上而觀周君為之望見其狀

盡成龍蛇禽獸車馬萬物之狀備具周君大悅畫莢之

功非不微難也然其用與素髹莢同

韓子外儲左

周武君使人刺伶悝於東周伶悝僵

周武君西周之君伶悝東周之臣也

僵斃而未死也

令其子速哭曰以誰刺我父也刺者聞以為死

也周以為不信因厚罪之刺者聞伶悝已死因報西周武君曰伶悝已死矣厚罪之

者罪所使刺伶悝者也 呂覽貴卒



春秋戰國異辭卷二